

神異典第五十四卷

神廟部紀事

隴州圖經隴州汧源縣有土羊神廟昔秦始皇開御道見二白羊鬬遣使逐之至此化爲土堆使者驚而回秦始皇乃幸其所見二人拜於路隅始皇問之答曰臣非人乃土羊之神也以君至此故來相謁言訖而滅始皇遂令立廟至今祭享不絕

廣古今五行記王莽時漢中太守五京往祭神廟遺其書刀遣小吏李高還取之見刀在廟牀上有一人著大冠絳袍謂高曰勿道我吾當祐汝後仕至郡守年六十餘忽道見廟神言畢而此刀刺高心下須臾而死莽聞甚惡之

風俗通朱虛侯劉章齊悼惠王子高祖孫也有氣力高后攝政諸呂擅恣章私忿之高后崩諸呂作亂欲危社稷章與周勃共誅滅之尊立文帝封城陽王賜黃金千斤立二年薨城陽今莒縣是也自琅邪青州六郡及渤海都邑鄉亭聚落皆爲立祠造飾五二千石車商人次第爲之立服帶綬備置官屬烹殺謳歌紛籍連日轉相誑耀言有神明其譴問禍福立應歷載彌久莫之匡糾唯樂安大傅

陳蕃濟南相曹操一切禁絕肅然政清陳曹之後稍復如故安有鬼神能爲病者哉予爲營陵令以爲章本封朱虛并食此縣春秋國語以勞定國能御大灾凡在於他尙列祀典章親高祖之孫進說耕田軍法行酒時固有大志矣及誅諸呂尊立太宗功冠天下社稷以寧同姓如此功烈如彼餘郡禁之可也朱虛與莒宜常血食於是乃移書曰到聞此俗舊多淫祀糜財妨農長亂積惑其侈可忍其愚可愍昔仲尼不許子路之禱晉悼不解桑林之祟死生有命吉凶由人哀哉黔黎漸染迷謬豈樂也哉莫之徵耳今條下禁申約吏民爲陳利害具有犯者便收朝廷若私遺脫彌彌不紀主者髡截歎無及已城陽景王縣甚尊之惟王弱冠內侍帷幄呂氏恣睢將危漢室獨見先識權發酒令抑邪扶正忠義洪毅其歆禋祀禮亦宜之於駕乘烹殺倡優男女雜錯是何謂也三邊紛拏師老器弊朝廷旰食百姓嘉然禮興在有年饑則損自今聽歲再祀備物而已不得殺牛遠迎他倡賦會宗落造設紛華方廉察之明爲身計而復僭失罰與上同明除見處勿後中覺

末句原
本疑誤

汝南鮑陽有

於田得麇者其主未往取也商車十餘乘經澤中行望見此麇著繩因持去念其不事持一鮑魚置其處有頃其主往不見所得麇反見鮑魚澤中非人道路怪其如是大以爲神轉相告語治病求福

多有效驗因爲起祀會衆巫數十帷帳鐘鼓方數百里皆來禱祀號鮑君神其後數年鮑魚主來歷祠下尋問其故曰此我魚也當有何神上堂取之遂從此壞傳曰物之所聚斯有神言人共獎成之耳

異苑漢使唐蒙開牂牁郡斬竹王首夷獠咸訴以竹王非血氣所生甚重之求爲立後太守吳霸以聞帝封三子爲侯死配食父廟今夜郎縣有竹王三郎祠是其神也

搜神記袁紹字本初在冀州有神出河東號度朔君百姓共爲立廟廟有主簿大福陳留蔡庸爲清河太守過謁廟有子名道亡已三十年度朔君爲庸設酒曰貴子昔來欲相見須臾子來度朔君自云父祖昔作兗州有一士姓蘇母病往禱主簿云君逢天士留待聞西北有鼓聲而君至須臾一客來著皂角單衣頭上五色毛長數寸去後復一人著白布單衣高冠冠似魚頭謂君曰昔臨廬山共食白李憶之未久已三千歲日月易得使人悵然去後君謂士曰先來南海君也士是書生君明通五經善禮記與士論禮士不如也士乞救母病君曰卿所居東有故橋人壞之此橋所行卿母犯之能復橋便差曹公討袁譚使人從廟換千匹絹君不與曹公遣張郃毀廟未至百里君遣兵數萬方

道而來邨未達二里雲霧繞邨軍不知廟處君語主簿曹公氣盛宜避之後蘇并鄰家有神下識君聲云昔移入湖闊絕三年乃遣人與曹公相聞欲修故廟地衰不中居欲寄住公曰甚善治城北樓居之數日曹公獵得物大如鷁大足色白如雪毛軟滑可愛公以摩面莫能名夜聞樓上哭云小兒出行不還公拊掌曰此子言真衰也晨將數百犬繞樓下犬得氣冲突內外見有物大如驢自投樓下犬殺之廟神乃絕

拾遺記漢靈帝熹平三年起裸遊館盛夏避暑長夜飲宴醉迷於天曉內官以巨燭投於殿下帝乃驚悟及董卓破京師焚其館宇至魏咸熙中其投燭之所冥夜有光如星時人以爲神光於此立室名曰餘光祠以祈福至明帝末稍除焉

華陽國志王濬爲益州刺史蜀中山川神祠皆種松柏濬以爲非禮皆廢壞燒除取其松柏爲舟船惟不毀禹王祠及漢武帝祠又禁民作巫祝於是蜀無淫祀之俗教化大行

述異記苻堅旣爲姚萇所殺於新平佛寺中後寺主摩訶蘭常夢堅曰可爲吾作宮旣而寺左右民家死疫相繼巫者常見堅怒曰吾不宮將盡殺新平民因共改寺爲廟遂無復災疾每年正月二日

民競祀以大牢新平寺今符家神也

益州之西雲南之東有神祠尅山石爲室下有神奉祠之

自稱黃公因言此神張良所受黃石公之靈也清淨不宰殺諸祈禱者持一百錢一隻筆一丸墨置石室中前請乞告聞石室中有聲須臾問來人何欲既言便具語吉凶不見其形至今如此

異苑晉丹陽縣有袁雙廟真第四子也真爲桓宣武所誅便失所在靈怪太元中形見於丹陽求立廟未既就功大有虎災被害之家輒夢雙至催功甚急百姓立祠堂於是猛暴用息今道俗常以二月晦鼓舞祈祠爾日風雨忽至元嘉五年設奠訖村人丘都於廟後見一物人面龜身萬巾七孔端正而有酒氣未知雙之神爲是物憑也 吳郡桐廬有徐君廟吳時所立左右有爲刦盜非法者

便加拘縛東陽長山縣吏李瑒義熙中遭事在郡婦出料理過廟請乞恩拔銀釵爲願未至富陽有白魚跳落婦前剖腸得所願釵夫事尋散

宋書毛修之傳修之爲右衛將軍不信鬼神所至必焚除房廟時蔣山廟中有佳牛好馬修之並奪取之

異苑衡陽山九疑山皆有舜廟每太守修理祭祀潔敬則聞絃歌之聲漢章帝時零陵文學奚景於

冷道縣祠下得筮曰玉管舜時西王母獻

會稽石亭埭有大楓樹其中空朽每雨水輒滿溢有

估客載生鱸至此聊放一頭於朽樹中以爲狡獪村民見之以爲魚鱸非樹中之物咸謂是神乃依樹起屋宰牲祭祀未嘗虛日因遂名鱸父廟人有祈請及穢慢則禍福立至後估客返見其如此卽取作臚於是遂絕

南齊書崔祖思傳祖思少有志氣好讀書史初州辟主簿與刺史劉懷珍於堯廟祀神廟有蘇侯像懷珍曰堯聖人而與雜神爲列欲去之何如祖思曰蘇峻今日可謂四凶之五也懷珍遂令除諸雜神

漢沔記襄陽漢水西村有廟名土地主府君極有靈驗齊永元末龔雙任馮翊郡守不信鬼神過此見廟因領人燒之忽旋風縱火有二物挺出變成雙青鳥入龔雙兩目應時疼痛聖體壯熱至明便卒

梁書王神念傳神念爲持節都督青冀二州諸軍事信武將軍青冀二州刺史神念性剛正所更州郡必禁止淫祠時青冀州東北有石鹿山臨海先有神廟妖巫欺惑百姓遠近祈禱糜費極多及神

念至使令毀撤風俗遂改

南史陰子春傳子春仕歷位胸山戍主東莞太守時青州石鹿山臨海先有神廟刺史王神念以百姓祈禱糜費毀神影壇屋舍當坐棟上有一大蛇長丈餘役夫打撲不禽得入海水爾夜子春夢見人通名詣子春云有人見苦破壞宅舍既無所託欽君厚德欲觀此境子春心密記之經二日而知之甚驚以爲前所夢神因辦牲醑請召安置一處數日復夢一朱衣人相聞辭謝云得君厚惠當以一州相報子春心喜供事彌勤

周書高麗國傳其俗好淫祀有神廟二所一曰夫餘神刻木作婦人之像一曰登高神云是其始祖夫餘神之子並置官司遣人守護蓋河伯女與朱蒙云

大業拾遺錄淝河岸上有子胥廟每朝暮潮時淝河之水亦鼓怒而起至其廟前高一尺廣十餘丈食頃乃定與錢唐潮水相應

唐書狄仁傑傳仁傑拜冬官侍郎持節江南巡撫使吳楚多淫祠仁傑一禁止凡毀千七百房止留夏禹吳太伯季札伍員四祠而已

靈應錄洋山在海中有廟其神傳是隋煬帝山高峻內有三湖名曰三姑菱茨鳧鴈鰲鸞之類悉有又有神立於門首號曰呂門官凡欲祭饗其廚多鼠而夏足蠅預告其門神卽絕之

唐國史補每歲有司行祀典者不可勝紀一鄉一里必有祠廟焉爲人禍福其弊甚矣南中有山洞一泉往往有桂葉流出好事者因目爲流泉後人乃立棟宇爲漢高帝之神尸而祝之

瀟湘錄元宗時詔所在功臣烈士貞女孝婦令立祠祀之江州有張安者性落拓不羈有時獨醉高歌市中人或笑之則益甚以至於手舞足蹈終不愧恥時或冠帶潔淨懷刺謁官吏自稱浮生子後忽無疾而終家人旣葬之每至夜其魂卽謁州牧求立祠廟言詞慷慨不異生存時李元爲牧氣直不信妖妄及累聞左右啟白遂朝服而坐召問之其魂隨召而至元問曰爾已死何能復化如人言詞朗然求見於余得何道致此必須先言余卽與爾議祠宇之事其魂曰大凡人之靈無以尙之物之妖怪雖竊有靈則雲與泥矣夫人稟天地和會之氣方能成形故人面負五岳四瀆之相頭象天之圓足象地之方自有智可以料萬事自有勇可以敵百惡那無死後之靈耶況浮生子生之日不以生爲生死之日不以死爲死其生也旣異於衆其死也亦異於衆生於今日聞使君之明遇天子

之恩若不求一祠則後人笑浮生子不及前代死者婦人女子也幸詳而念之設若廟食自使君也使浮生子死且貴於生又足以見人間貪生惡死之非也州牧曰天子立前代之功臣烈士孝女貞婦之祠者示勸戒欲後人倣效之苟立祠於爾不知以何使後人倣效耶魂曰浮生子無功無孝無貞可紀也使君殊不知達人之道高尚於功烈孝貞也州牧無以屈命私立祠焉

宣室志元載布衣時常與故禮部侍郎張謂友善貧無僕馬弊衣徒行於陳蔡一日天暮忽大風雷原野晦黑二人相與詣道左神廟中以避焉時有盜數輩皆仗劍佩弧矢匿於廟宇下元張二人忽見之惶懼益甚且慮爲其所害二人卽負壁而立不敢動俄聞廟中有呼者曰元相國張侍郎且至羣盜當疾去無有害於貴人羣盜相目而驚遂馳去二人因偕賀吾向者以殍死爲憂今日真神人之語也且喜且歎其後載果相代宗謂終禮部侍郎

唐書李紳傳紳南逐歷封康間湍瀨險澀惟乘漲流乃濟康州有媼龍祠舊傳能致雲雨紳以書禱俄而大漲

柳宗元傳宗元爲柳州刺史旣沒柳人懷之託言降於州之堂人有慢者輒死廟於羅池愈因碑以

實之云

林蘊傳蘊字復夢泉州莆田人父披字茂彥以臨汀多山鬼淫祠民厭苦之譏無鬼論

集異記房州永清縣去郡東百二十里山邑殘毀城郭蕭條穆宗時有孫令自京之任踰年其弟靈省乍覩寥落不勝其憂暇日周覽四隅無非榛棘見荒廟歸然土偶羅列一神當座三婦侍側無門榜標記莫知誰氏訪之邑吏但云永清大王而已令弟徙倚久之莫雪其悶賦詩於壁以請以嘆頃之昏然成寐與神相接神謂之曰我名跡不顯久矣鬱然欲自述其由恐爲妖怪今吾子致問得申素誠以達積年之憤我毗陵人也大父子隱爲大將軍吳書有傳將軍誅南山之虎斬長橋蛟龍與民除害陰功昭著余素有壯志以功佐時余名郭浦爲上帝所命於金商均房四郡之內嘗有驚獸暴害於人漁樵不通道塗斷絕余數年之內勦戮猛虎不可勝數生聚頓安虎之首帥在西城郡其形偉博便捷異常身如白錦額有圓鏡光彩閃爍害人最多余亦誅之殄滅其類居人懷恩爲余立廟自襄漢之北藍關之南省形構宇三十餘處及此廟貌皆余憩息之所也歲祀綿遠俗傳多誤以余祠爲白虎神廟謬之甚矣幸君子訪問得敘首末願爲顯示以正其非他日令弟話於襄中賓幕

編述書版置於廟中塵侵雨漬文字將滅大中壬申歲襄州觀察判官王士澄督繕支郡覽而異之恐板本銷誤乃刻石於廟

雲溪友議蜀前將軍關羽守荊州荊州有玉泉祠天下謂四絕之境或言此祠鬼助土木之功而成祠曰三郎神三郎卽關三郎也允敬者則彷彿似覩之縉侶居者外戶不閉財帛縱橫莫敢盜者廚中或先嘗食者頃刻大掌痕出其面歷旬愈明侮慢者則長蛇毒獸隨其後所以懼神之靈如履冰谷非齋戒肅淨莫得居之

甘澤謠韋駟者明五音善長嘯自稱逸羣公子舉進士一不第輒已曰男子四方之志豈拘節於風塵哉游岳陽太守以親知見辟數月謝病去駟親弟驤舟行溺於洞庭湖駟乃水濱慟哭移舟湖神廟下欲焚其廟曰千金賈胡安穩獲濟吾弟窮悴乃罹此殃焉用爾廟爲忽於舟中寐夢神人盛服來謁謂駟曰幽冥之途無枉殺者明公先君嘗爲城守方剛讜正鬼神避之撤淫祠甚多不當廢者有一二神上訴帝初不許固請十餘年乃許與後嗣一人謝二廢廟之主然亦須退不能知其道進無以補於時者故賢弟當之耳倘求喪不獲卽我之過令水工送屍湖上駟驚寤其事遽止遂命漁

舟施釣繆果獲弟之屍於岸是夕又夢神謝曰鬼神不畏忿怒而畏果敢以其誠也君今爲人果敢如是吾所以懷畏昔洞庭張樂是我所司願以至音酬君厚德所冀觀咸池之節奏釋浮世之憂煩也忽觀金石羽籥鏗鏘振作闐闐甚嘆異以爲非據曲終乃寤

志怪顧邵爲豫章崇學校禁淫祠風化大行歷毀諸廟至廬山廟一郡悉諫不從夜忽聞有打門聲怪之有一人開閤逕前狀若方相自說是廬君邵獨對之要進上牀鬼卽入坐邵善左傳鬼遂與邵談春秋彌夜不能相屈邵歎其精辨鬼求復廟言旨懇至邵笑而不答鬼怒而退顧謂邵曰今夕不能離君三年之內君必衰矣當因此時相報如期邵果篤疾恆夢見此鬼來擊之並勸邵復廟邵曰邪豈勝正終不聽後遂卒

酉陽雜俎孝億國舉俗事妖不識佛法有妖祠三百餘所

俱德建國烏潯河中灘派中有火祆

祠相傳祆神本自波斯國乘神通來此常見靈異因立祆祠內無象於大屋下置大小爐舍簷向西人向東禮有一銅馬大如次馬國人言自天下居前脚在空中而對神立後脚入土自古數有穿視者深數十丈竟不及其蹄西域以五月爲歲每歲日烏潯河中有馬出其色如金與此銅馬嘶相應

俄復入水近有大食王不信入祆祠將壞之忽有火燒其兵遂不敢毀

稽神錄建州梨山廟土人云故相李回之廟回貶爲建州刺史後卒於臨川卒之夕建安人咸夢回乘白馬入梨山及凶問至因立祠焉

錄異記蜀庚午歲金州刺史王宗朗奏洵陽縣洵水畔有青烟廟數日廟上烟雲昏晦晝夜奏樂忽一旦水波騰躍有羣龍出於水上行入漢江大者數丈小者丈餘或黃或黑或赤或白或青有如牛馬驢羊之形大小五十壘壘相次行入漢江却回廟所往復數里或隱或見三日乃止

玉堂閑話魏州南郭狄仁傑廟卽生祠堂也天后朝仁傑爲魏州刺史有善政吏民爲之立生祠及入朝魏之士女每至月首皆詣祠奠醴仁傑方朝是日亦有醉色天后素知仁傑初不飲酒詰之具以事對天后使驗問乃信 莊宗觀霸河朔嘗有人醉宿廟廊下夜分卽醒見有人於堂陛下磬

折咨事堂中有人問之對曰奉符於魏州索萬人堂中語曰此州虛耗災禍頻仍移於他處此人曰諾請往白之遂去少頃復至曰已移命鎮州矣語竟不見是歲莊宗分兵討鎮州所殺甚衆焉

揮塵後錄太祖皇帝草昧日客遊睢陽醉臥闕伯廟夢中覺有異既醒焚香殿上取水環琰以卜平

生自裨將至大帥皆不應遂以九五占之玳盤旋空中已而大契太祖益以自負後以歸德軍節度使建國號大宋升府曰應天晏元獻爲留守以詩題廟中云炎宋肇英祖初九方潛鱗嘗用著蔡占來決天地屯庚契大橫兆警咳如有聞其後高宗皇帝炎精復耀中興斯地灼見天命猗歟休哉老學菴筆記太宗太平興國四年平太原太原有晉文公廟甚盛平太原後三年帥潘美乞以爲并州從之於是徙晉文公廟以廟之故址爲州治

崖下放言祥符中西蜀有二舉人同硯席旣得舉貧干索旁郡乃能辦行已迫歲始發鄉里懼引保後時窮日夜以行至劍門張惡子廟號英顯王其靈響震山川過者必禱焉二子過廟已昏晚大風雪苦寒不可夜行遂禱於神各占其得且祈夢爲信草草就廟廡下席地而寢入夜風雷轉甚忽見廟中燈燭如晝然後有俎甚盛人物紛然往來俄傳道自遠而至聲振西山皆岳瀆貴神也卽席賓主勸酌如世人二子大懼已無可奈何潛起伏暗處觀焉酒行一人曰帝命吾儕作來歲狀元賦當議題一神曰以鑄鼎象物爲題旣而諸神皆一韻且各刪韻刪改商確又久之遂畢朗然誦之曰當召作狀元者魂魄受之二子默喜私相語曰此正爲吾二人發迨將曉見神各起致別傳呼出廟而

去視廟中寂然如故二子素聰警盡記其賦亟寫於書帙後無一字忘相與拜賜鼓舞而去僧道以行笑語欣然惟恐富貴之逼身至御試二子坐東西廊御題果出鑄鼎象物賦韻脚盡合東廊者下筆思廟所書懵然一字不能上口問關過西廊問之西廊者望見東來者曰御題驗矣我乃不能記欲起問子幸無隱也東廊者曰我正欲問子也於是二子疑曰臨利害之際乃見平生但此神賜而獨私以自用天其福爾邪各憤怒不得意草草信筆而出唱名二子皆被黜狀元乃徐爽既見印賣賦二子比廟中所記者無一字異也二子歎息始悟凡得失皆有假手者遂皆罷筆入山不復事筆硯恨不能記其姓名云

青瑣高議寇萊公赴貶雷州道出公安剪竹插於神祠之前而祝之曰準之心若有負於朝廷此竹必不生若不負朝廷此竹當再生其竹果生

宋史任中師傳中師知廣州視事之明日吏白故事當謁諸祠廟而靡有淫祠中師遽命撤去之王嗣宗傳嗣宗爲淮南轉運使江浙荆湖發運使揚楚間有窄家神廟民有疾不服藥但謁致祀以徼福嗣宗徹其廟選名方刻石州門自是民風稍變後進銀臺司兼門下封駁事出知并州兼并代

部署州境有臥龍王廟每窮冬閭境致祭值風雪寒甚老幼踣於道嗣宗亟毀之大中祥符四年邠
寧陳興擅釋刼盜徙嗣宗知邠州兼邠寧環慶路都部署城東有靈應公廟傍有山穴羣狐處焉妖
巫挾之爲人禍福民甚信向水旱疾疫悉禱之民語爲之諱狐音前此長吏皆先謁廟然後視事嗣
宗毀其廟燬其穴得數十狐盡殺之淫祠遂息

胡穎傳穎湖南提舉常平卽家置司性不喜邪佞尤惡言神異所至毀淫祠數千區以正風俗衡州
有靈祠吏民夙所畏事穎撤之作來諭堂奉母居之常語道州教授楊允恭曰吾夜必瞑坐此室察
影響咸無有允恭對曰以爲無則無矣從而察之則是又疑其有也穎甚善其言

退朝錄列子廟在鄆州圃田其地有小城廟貌甚古相傳有唐李德裕王起題名而前輩留紀甚多
景祐中王文惠公爲章惠太后園陵使還請增葺之於是舊迹都盡今其榜陳文惠之筆

聞見前錄余爲西蜀憲其治在嘉州州之西有花將軍廟將軍英武見於杜子美之詩廟史以匣藏
唐至德元年十月鄭丞相告云花驚定將軍也是歲吐蕃陷嵩州將軍與丞相豈同功者耶告後列
金紫光祿大夫左相國公臣正議大夫門下侍郎平章事博陵縣開國男臣不書姓名右相關銀